


Viadi da matura 2025

Da Scuol al mar da Malaga

Mia

Venderdi, 12-09-2025



Nos viadi nun ha cumanzà propcha bod. Nus vain pudü durmir lönch ed a las 09:41 eschna partits cul tren vers Basilea. Tuot la procedura dal check-in, il chec da sgürezza e chattar il «gate» ans ha occupats per plü o main ün'ura. E lura vaina spettà. L'aviun es svolà pür a las 17:15 ed a las 14:00 füssna fingià stats pronts dad entrar e partir vers la Spogna. No vain dimena fat trais girs tras l'eroport e spettà e spettà. Finalmaing vaina pudü ir aint il aviun. Che prestaziun! Il svoul ha dürà var duos uras e mez. Rivats intuorn las ot a Malaga, ans spettaiva fingià ün taxi chi'ns ha manats in vicinanza da nos AirBnB. Cun nossas valischs e buschas tras giassinas e sur vias via vaina chattà noss'abitaziun precis i'l center istoric da Malaga. Eir schi d'eira fingià s-chür, chaminaiva glieud sco furmias da tuot las varts e nus ans vain allegrats da far quia ün'eivna vacanzas.


Davo avair tschnà cun noss magisters eschna its directa-maing a la riva dal mar. Nossa roba da nodar vaivna nempe paquetà fingià avant tschaina. Dasper üna bella riva vaina cumprà amo ün pêr bavrondas e vaivan fingià quista savurina d'aua da sal i'l nas: la savur da vacanzas. Pro'l mar vaina tscherchè ün bel löin per sezzar e vain fat ün pêr gös. Plü tard es gnüda la cuvaida d'ir aint ill'aua. Svelt ans vaina müdats ed eschan currits vers l'aua chi d'eira plütost frais-china, ma amo supportabla. Cur cha no eschan gnüts our da l'aua, traiva ün ventin fraid. Ma no'ns vain s-chodats cun noss süaintamans. Tuot in üna jada vaina vis a svolar üna pitschna ballina da fö in rinchs ed ans vain dumandats che cha quai es. No eschan its plü daspera e vain vis chi d'eira là duonnas chi faivan üna show cun fö.

Per ün mumaint vaina guardà co ch'ellas faivan quai ed eschan stats impreschiunats quant quant bain chi san ir intuorn cul fö. Ma plan planet gniva tard e no ans vain fats in viadi per tuornar in nossa abitaziun. I nun es stat gnanca uschè simpel da tilla chattar, cun quai chi d'eira s-chür e no nu cugnuschaivan amo uschè bain las vias. Ma per furtüna vaivna noss telefonins e Google Maps chi'ns ha muossats la via.



Ün di illa cità da Malaga

Balduin Sonda 10-09-2025



Davo esser stats a la riva dal mar in venderdi ha Alberto muossà a nus la cità e nus eschan its sùls mürs dal Alcazaba y Castillo de Gibralfaro. Da las ündesch a las duos eschna stats sùls mürs. Lura ans vain nus seperats per ir perquai d'intuorn sulets. Avant eschna amo its a mangiar tacos culla classa, duonna Santer ed Alberto. Davo avair fat ün gir illa cità ans vaina radunats per ir a verer il mür il plü grond. Davent da quel as vezza tuot la cità, bellezzas! La saira vain nus cuschinnà pasta ed eschan its amo in üna bar.

Ün di cul catamaran

Julia, dumengia 14-09-2025



La dumengia eschna its cun ün catamaran.


Displaschaivelmaing d'eira tschiera, uschè cha nus nu vain pudü giodair la bella vista sül mar. Blers da no d'eiran fich stanguels,

causa cha no nu vaivan durmi bler la not avant.

A mezdi vaina surgni ün bun giantar. Davo trais uras sülla barcha sainza mal da mar es statta a fin noss'aventüra.

Ûn di be aventüras: cun canyoning, in ùn cumün blau ed a Ronda

Balduin, lündeschi, 09-09-2025





A las 6:30 ha sclingi il svagliarin per ir a far canyoning. Aint il bus nu vaina dit blier, tuots d'eiran fich stanguels. Rivats al lö, ans vaina trats aint per l'acziun: Neoprens, chaplinas ed oter equipamaint. Lura vaina stuvü chaminar tras ün god per rivar pro'l flüm e là ha tuot cumanzà. Il prüm da tuot vaina gnü da'ns laschar giò ündesch meters cun üna sua per rivar pro üna cascada. Medea es ida il prüm, Alberto l' ultim. Be ün pêr scolaras sun rivadas da far tuot inandret: Julia, Medea e Mia. Schi's mettaiva il pê aint ill'aua da la cascada, as svolaiva nempe giò ils ultims meters.

Rivats giò sans e salvs eschna chaminats inavant tras il flüm. I d'eira alch craps fich glischs, sur quels as pudaiva sglischar sco giò d'üna sglischaduoira.

Aviond dovrà tuot l'adrenalin aint il corp, eschna its in seguit a verer ün cumün cun chasas blauas, pü s-chüras e plü cleras, ingio cha'l sulai splenduraiva. Tuot guardaiva oura plü o main listess, be ün pêr chasas vaivan sü "Schlumpfs". In quel cumün vaivna fat la premiera dad ün da quels films. A mai paraiva la chasa fuormada sco ün bulai da tössi la plü interessanta.

Davo cha nus vain visità la cità blaua, eschna its amo a verer Ronda, cun üna bella cità veglia. Davent dad üna punt as vaiva üna vista da nar. Lönch nun eschan restats là, causa cha nus ans insömgiavan tuots be plü dad alch, dad ir in noss lets. I d'eira amo adüna chalurs, sur 30°. Cur cha nus vain pudü tuornar cun nos busin climatisà ans vaina tuots indrumanzats, satisfats dal di be aventüras.

La cuschina in noss'abitaziun simpatica

Julia



La saira d'eirna pelplü fich stanguels e nu vaivan plü blera vöglia dad ir a tschaina in ün'ustaria. Uschea ans vaina decis da cuschinar svesa. No vain fat be a la simpla: pasta cun sosa. I's sto dir cha Mia ha fat la la gronda part ed ha fat fich bun damangiar per no chi vain lura pudü giodair ils pasts cun tadar musica.

Üna saira ans han ils magisters fats üna visita a l'improvista per verer cha co chi'ns va ed han guardà eir nossa abitaziun. Per furtüna vaivna güsta avant fat uorden 😊!

In general eschna stats fich cuntaints cun nossas quatter parais.

I d'eira grond avuonda per tuots. No vaivan quatter stanzas, dimena duos e duos d'eiran insembel in üna chombra cun ün pitschen balcon aviond vista giò sülla via e la glieud chi giraiva via e nan. Implü d'eira ün areal, circumdà da parais, ingio cha tuots pudaivan star da cumpagnia. Là staid la saira, vain discurrü e fat gös.

L'abitaziun d'eira situada in ün lö fich central, cun blers restorants ed eir ün supermarchà güsta daspera. Impustüt per ir al mar d'eira eir flot, causa chi's rivaiva in vainch minuts a pè a la riva.

Granada

Balduin, mardi 15-09-2025



La bunura bod vain nus, tuots ün pa stanguels da la sortida dal di avant, tut il bus per ir a Granada. Bod tuot chi durmiva o tadlaiva musica.

Rivats a Granada eschna its il prüm a mangiar churros.

Quels vaina surgni cun üna tschiculatta choda, ma na üna svizra! Ella d'eira fich spessa e na propa dutscha. Alberto ans ha lura muossats cha'ls

Spagnöls mettan zücher süls churros o eir aint illa tschiculatta.

Ils churros vaivan aint fich bler grass, d'eiran plain öla, perquai ha nos püschain propcha saduollà in uorden.

Davo "culaziun" eschan nus its ün pa pellas giassas da Granada.

Vers mezdi sun las temperaturas lura gnüdas massa otas per restar in cità, i d'eira 35°C, perquai ans vaina decis dad ir in ün caffè a baiver aua cun glatschins e là vaina discurrü bod duos uras.

Mia, Anna,

Alberto ed eu ans vain lura decis da chaminar sün üna piazza cun üna bella vista sur la cità. Il rest da la classa ha tut il bus. Cun chaminar eschna rivats tras il quartier muslim.

Tuot las chasas d'eiran albas. Quel toc da la cità am ha trat adimaint la Grecia. Rivats pro la piazza vaina fat fotografias e giodü la vista. Ma eir quia d'eira simplamaing massa chod.

Alberto as ha lura decis cha nus pudessan ir aint il center da consümar da Granada. Là eschan its pellas butias e vain cumprà ün'e tschella roba da trar aint. Tschnà vaina in ün oter lö. Vers las 20:00 eschna tuornats cul bus a Malaga. Darcheu tuot chi durmiva. E cur cha nus eschan rivats, che voust oter, eschna its in sortida.

La chasa da Picasso

Balduin / Medea, marcurdi, 16-09-2025



Vairamaing laivna ir aint il museum da Picasso, ma cur cha no vain vis la lingiada da glieud chi spettaiva illas chalurs dal sulai, vaina decis da tuornar ün oter di. Uschea eschna its a verer la chasa ingio cha Picasso ha passantà si'infanzia. La chasa d'eira traptida in duos parts.

Ouvra d'ün artist plü modern illa chasa da Picasso

Id es propcha stat cool da gnir a savair daplü da l'infanzia d'ün artist uschè important, co ch'el es creschü sü e spectacular esa eir quantas duonnas e relaziuns ch'el ha gnü. Illa chasa d'eiran plüs purtrets da Picasso chi nu sun uschè valurus sco quels i'l museum. Da si'art nu s'haja però vis bler. Il di davo eschna its i'l museum da Picasso.

Flamenco

Medea, gövgia, 16-09-2025



Davo ün bel di a la riva eschna chaminats vers ün restorant cun nom “Allegria”. Cur cha no eschan en-trats illa sala dal restorant d’eirna tuots agitats e no nu vain savü che chi’ns spetta. No ans vain tschantats, vain postà ün pêr bavrondas dutschas cun bler glatsch e vain discutà e filosofà da la saira ventura. Lura s’han stüzzas las glüms ed ün hom es i sül palc. Cun üna misculanza d’euforia ed umur ans ha’l quintats dal flamenco, dals sotunzs, dal guitarrist e las chantaduras. El ha abandonà il palc ed ün guitarrist ha cumanzà a sunar chanzuns da bellezza e quai da maniera incredibla, cun üna paschiun ed emoziun chi’ns ha impreschiunats e tocs a nus tuots. Lura es gnü ün ballerín sül palc chi ha ballà culla chanzun dal guitarrist. Il ritem dals clocs dals tachs da sias s-charpas ha accompagnà la melodia da la guitarra, ün’armonia da star be stut. Lura sun gnüdas duos chantaduras sül palc ed han chantà cun vuschs fermas: be fö e flomma. Per finir es eir amo entrada üna sotunza chi ha ballà cul ballerín e cun ün ultim splat han e ls finì lur preschantaziun. Nus eschan stats fascinats. Cur cha nus vain bandunà la sala vaina improvà da ballar eir no flamenco e vain badà bain svelto chi’d es bler plü greiv co chi para in guardond ils bals ligers dals profis. La saira es ida a fin cun üna risada, causa mancanza da nos talent e cun ün evenimaint chi’ns restarà per adüna.

Dal museum da Picasso aint il Hamam, Gövgia 17.09.2025





Medea

Cur cha nus eschan entrats i'l museum da Picasso vaivan be pacs da no vögliä da's confuonder cull'art abstracta. No nu vain propcha provà dad analisar ed interpretar sias ouvras. Per bleras sfrignidas han procurà tuot seis purtrets da duonnas nùdas e seis citats narcissitics sco "Sch'eu vess fat militar, füssa dvantà ufficial, ma eu sun gnü ün artist e dvantà Picasso".

Davo cha nus vain vis tuot il museum, eschna its inavant, in ün bogn fich special: Il Hamam. Il prüm vaina surgni bels süantamans e la massascha cun bunas ölas e vaschias da savun ans ha fats bain. Davo vaina pudü nodar amo ün'ura i'ls bels bogns arabs chi d'eiran per part s-chodats. Nus vain tuots giodü nos di da Spa e'ns vain sentits sco nouvnaschüts.

Sushi pels ons d'Alberto


Balduin

Davo il Hamam eschan its a mangiar Sushi pels ons d'Alberto. El ha sperà cha nus nu gnian a savair da nöa, ma Laura e Julia Santer ans han tradits ch'el haja anniversari. Il Sushi ha gustà fich bain, ed id es stat flot dad esser in ün restaurant ün pa plü bel cun tuot la classa. Per Alberto eschan its per üna tuorta da tschiculatta, sainza savair ch'el nu vess jent. Ma i til ha listess parü üna bella surpraisa. Davo es la classa ida ill'abitaziun per as parderdscher per ir in sortida, Alberto e Julia Santer ans han eir accumpagnats. E daplü nu tradina.

Retuorn a chasa



Mia



Per tuornar a chasa vaina gnü da star sü bodezzas: A las tschinch a bunura stuvaivan esser a l'eroport.

Bleras conversaziuns nun haja dat ed eir aint il eroplan nu vaina fat oter co durmir o almain provà. Il viadi cul tren fin in Engiadina es stat stantus, ma quai è'l adüna, tras quist Partens dal trenta chi nu schmetta plü. Finalmaing eschna rivats la davomezdi a chasa cun milli algordanzas inschmanchablas.